

ARUBA ANTAAÑO

UN TREMENDO YOBIDA PERO POCO TERENO PA PLANTA



Un palo di awacero ta cos cu nos conoce y ricibi cu amor y dedicacion na nos cunucu nan pa cu asina planta y tin e bon alimentacion pa nos hengenan.

Nos isla, of mihor bisa nos bieuwnan, semper ta goza di un bon yobida pa cu asina nan por dedica cu amor y orgullo den cunucu pa cu e plantacion. Hopi di e productonan cu awe nos tin di depende for di importacion, tabata loke nos mes tabatin y percura p'e den nos Aruba Antaño. Tuma por ehemplo un Cob on the Corn, cu otro palabra un maishi grandi cu nos tera y cunucunan a yega di produci, no un tapushi manera e foto cu ta acompaña e dushi recuerdonan aki. Patía, milon, pinda, druif, pampoena, calbas largo, yambo y tur e otronan cu ta asina tanto pa menciona, awe ni sikiera ta aparece, sino uno aki y aya.

E casnan por ta di torto of di piedra, pero den nan interior ta sinta e verdadero calor hogareño, no e discusion, y mal comportacion cu tin awendia den hopi hogar. E plantacion ta desvaneciendo, pasobra e cabeznan di pal'imainshi tin cu kita e teranan for di caminda pa construccion, lubidando cu no solamente e plantacion, e matanan, e palonan, ta e fuente di nos bida pa loke ta e alimentacion y e oxigeno cu nos curpa tin mester di dje.

Tempo di Lago y di Savaneta Kamp cu e schutterijnan, tin e concido dos dia liber pa bai planta. Pero tambe ta bon conoci cu unda cu tin un refineria, tambe e yobida nan ta bira menos, e atmosfera y e medio ambiente den un forma of otro ta haci su mes presente.

Ohala cu ainda nos por tin di nos hendenan y nos teranan disponible pa cu asina ricibi e bendicion di un awacero cual ta loke ta haci falta den hopi otro lugar, ta di spera tambe cu e poco tera cu nos tin pa plantacion ser conserva pa bienestar di nos tur.